

明朝典彙




漢書門			
九	二	〇	〇
六	一	〇	〇
四	三	四	五
冊	架	函	號

內閣文庫			
九	二	〇	〇
六	一	〇	〇
四	三	四	五
冊	架	函	號

內閣文庫	
番號	漢 920〇
冊數	64 (24)
函號	294 39

廿四



國朝典彙卷三十九

都察院右僉都御史

臣徐學聚

編輯

淺草文庫

吏部六

朝覲考察

洪武元年正月天下府州縣官來朝陛辭 上諭之曰天

下初定百姓財力俱困譬猶初飛之鳥不可拔其羽新

植之木不可搖其根要在安養生息之而已惟廉者能

約已而利人貪者必賸人而厚已况人有才敏者或泥

於私善柔者或昧於欲此皆不廉致之也爾等當深戒

之

六年正月守令來朝命賜酒食明日陞辭復諭之曰慈祥愷悌身之德也刻薄殘酷德之賊也君子成其德而去其賊故惠及於人小人縱其賊而悖其德故殃流於衆且人莫不有是德君子守之不失故天理恒昭融於中小人舍而不爲故私欲恒蔽鋼於內朕之任官所用惟賢舉廉興孝惟欲厚俗崇德勸善惟欲成風若僞爲慈祥必無仁愛之實僞爲愷悌必無樂易之誠爾等宜勉脩厥德廣施惠政以副朕懷

八年正月朔各省郡縣入朝 上以濟寧知府方克勤有

善政錫燕儀曹

十一年正月徵天下布政司官及各府官來朝 上謂廷臣曰古者帝王治天下必廣聰明以擴壅蔽今布政使官卽古方伯之職各府知府卽古刺史之職所以承流宣化撫安吾民者也然得人則治否則瘵官曠職病吾民多矣朕今令之來朝使識朝廷治體以警其玩愒之心且以詢察言行考其治績以觀其能否苟治效有成卽爲賢才天下何憂不治廷臣對曰 皇上憂民之切任官之重堯舜詢事考言之道也

十七年令天下諸司官吏來朝明年正旦各造事蹟文冊

仍畫土地人民圖本如期至京

十八年正月吏部言天下布按二司及府州縣朝覲官凡
四千一百一十七人考其政績詔稱職者陞平常者復
其職不稱職者降貪污者送法司罪之闕茸者免為民
二月國子博士高允憲請察方面郡縣官節行卓異政事
公平者增秩賜金其闕茸不職及貪苛虐民者斥逐誅
戮使人知勸懲 詔納之

六月 上諭吏部曰天下府州縣官一歲一朝未免曠官
滋費自今定為三年一朝齋其紀功圖冊赴部考覈布
按二司官亦然著為令

二十九年十二月 詔定外官三年一朝覲

永樂三年正月諭吏部雲南道路遙遠其布政司按察司
并所屬府州縣俱免明年應朝餘如舊制

五年十二月廣東布政使徐奇入覲載嶺南藤篔簹將以饋
廷臣邏者獲其單目以進 上視之無楊士奇名乃獨
召之問故士奇曰奇自都給事中受命赴廣時眾皆作
詩文贈之故有此饋臣時有病無所作不然亦不免今
眾名雖具受否未可知且物甚微當亦無他 上意解
即以單目付中官令燬之一無所問
九年正月命吏部凡官邊方當朝者皆止勿來



十年正月 上問鴻臚寺及六科曰前日命朝覲官言民瘼已言者幾人對曰百十人 上曰一郡一縣未必都無一事可言都無一民不安盡今日悉上所言令六部議便於民者卽行言有不當勿問緘默者罪

刑部都察院六科劾奏天下朝覲官千五百餘人勘合多未完請付法司究治 上命各部條目已完者八十餘員賜鈔五十錠復職餘未完者亦宥復職

十一年四月 上謂禮部尚書呂震曰朕嘗命布按二司及府州縣官至京者陳民間利病近有以時和歲豐民安物阜爲言者及驗視之田野蕪蕪人民饑寒水旱蟲

蝗皆不以聞朕已寘諸法今後所言有切民情治理者宜旌賞之否則重懲勿貸

宣德五年正月初天下朝覲官至京 上命吏部廉察其賢否又令方面官各具所屬官貪虐及不稱職者上名吏部至吏部奏貪污者二十五人當克邊軍老疾及鄙猥無能者五十五人當北京爲民 上曰老疾鄙猥無能者皆罷歸爲民貪污者民之害宜發戍邊

七年令吏部同都察院考察在外方面有司官昏懦不立貪暴無厭者具奏罷黜

又令各處巡撫侍郎同巡按御史考察方面官仍同方面

官考察州縣官

八年正月天下朝覲官在京 上問吏部尚書郭璉曰先
所任九人爲知府亦有來者乎璉以何文淵等七名應
乃召入便殿命中使傳語獎勞

賜溫州知府何文淵等七人宴於廷以御製招隱詩賜之
十年四月 英宗因天久雨水潦蝗蝻勅諭吏部都察院
考察在外布按二司及府州縣官不才者照例發遣有
缺仍遵 宣宗勅旨舉保不許故違有犯贓罪連舉主
七月先是巡按直隸御史張清考懷寧知縣宋顯闕茸不
勝任顯訴冤狀復命巡撫侍郎等官公察其實以聞遂

復顯職論清之罪 上因諭吏部曰考察有司本欲去
貪存廉以示勸懲一或偏徇則所枉多矣卿等戒之

正統十年正月給事中鮑輝言天下各官來朝乞勅吏禮
二部詢訪有廉能著稱治行超卓者禮部官引赴御前
面獎勸賞吏部具錄姓名待其考滿舉薦擢用 上從
之因舉司府州縣官布政丁鎡等賜以勅諭宴於禮部
各賞衣一襲鈔百錠復任候吏部遇缺推用尋擢丁鎡
爲刑部左侍郎汝寧知府李敏爲應天府尹

十月吏部侍郎趙新言近者各處巡按御史奉勅考核司
府州縣官多有任情黜陟未加精詳以故被黜官起送

到部率訴枉抑乞令本部重加審察其堪用者仍前復職或量才改用果不稱者如例黜罰 上曰已往考黜者不問今後各處送到老疾罷軟不勝任者吏部堂上官從公審察果應黜者如例處置間有精力才行堪用或素有政績者其實來聞毋容輕聽妄訴徇私廢公十一年四月吏部言本部聽選官有奏要勅大臣與御史考察天下方面守令緣近有旨令巡按及布按二司詢察府州縣官其二司官從御史舉劾若再遣官未免勞擾 上曰朝廷考課已有定制今後凡考滿官令該管上司考察實行送吏部覆考見任者令風憲等官照近例考黜果有治行超異者具奏俟考滿時量加陞擢務要黜陟公明人知懲勸若考察官任情好惡顛倒是非俱重罪不貸

景泰三年七月命侍郎李賢姚夔副都御史洪英等分詣兩直隸十三省考察庶官之不職者諭之曰朕惟治理以任官爲本任官以得人爲先任得其人則官使皆賢才而政事無不理政得其理則民庶皆安養而天下無不治近聞各處方面有司等衙門官固有持心公正操行端潔之人雖其作爲長短不同然不失爲君子此等之人長於作爲者當明陳其事績可旌可擢短於作爲

國朝典彙卷三十九 職官考
者當明陳其老壯可存可放所以待君子使人有所勸
亦有貪淫無恥酷暴不仁之徒雖其能否老壯不同然
不免爲小人此等之徒不必問其能否老壯當明陳其
過犯顯然證佐可罪可黜所以待小人使人有所懲然知
人之難從古以爲病固有行實貪淫而善於結交要譽
以自固者心實酷暴而巧於容悅逢迎以自掩者小人
固如是矣君子或不能然反見嗔於人者有之欲得存
舍之功未之有也今特命爾分往浙江等布政司考察
方面文職有司等衙門官務在躬親徧歷廣詢博訪果
有前項君子宜加禮待存畱在任管事其有可以旌擢

及或老疾罷軟不能辦理例應致仕及革職者明白開
具實跡奏來并送吏部應放免者就彼放免果有前項
小人闖茸不才所爲太甚爲民害者明白開其過惡顯
然證佐實跡奏送來京處治當送問者送按察司并巡
按御史處問理依律照例發落夫進退人才非易事爾
須廉以立己之本明以求人之實公以正己之權度恕
以處人之用舍毋惑于恩讎之屬託毋私於親故之情
毋好毋徇於勢要之使令毋徇於利害之報復庶副委任
七年令撫按會同按察司堂上官考察府州縣官其布按
二司官聽撫按考察

十月河南巡撫馬謹奏勅覈所屬官吏凡貪酷無狀者悉黜之

天順四年正月天下朝覲官至京上召大學士李賢謂曰朝覲之弊不可不革賢曰誠如聖慮卽出榜禁約不許與京官交通餽送土物亦不許下人挾讎告害上曰黜陟之典亦當舉行賢曰祖宗舊制也時吏部都察院會考不職者數百人奏退之舉其才行超卓政績顯著者布政以下賈銓等十人上聞賜以衣服楮幣宴之禮部命太監牛玉及李賢王翱侍宴隨於其中召布政蕭暉爲禮部尚書賈銓爲副都御史

成化六年九月吏部言邇者兩奉詔旨以人才難得恐考察黜退官中尚有一二可用者命臣等集議臣等詳審得平樂知府袁衷泰安知州畢宗賢修武知縣劉昭濟寧州判張寧歷城主簿郝志道俱被黜之數舍短取長尚有可用其餘一時難知不敢泛舉至於伸訴奏告之人難以准理宜照舊發遣從之

十三年十一月上以天下諸司官吏朝覲至京姦詐之徒或緣私讎妄相告訐嚇騙財物及陰構以事中傷善良大傷治體其朝覲官員賢否不同朝廷黜陟自有常典亦不許與京官往來交通賄賂營求作弊命都察院

揭榜通行禁約違犯者槩治以罪

十九年十二月吏科給事中王瑞等言三載黜陟朝廷所以勵庶官之典也今天下諸司除土官外無慮幾千餘處諸司官除陰陽醫學僧道外無慮十萬餘員吏部於各官之賢否在布按二司則據撫按揭帖在諸司則參布按等官揭帖上之詢訪雖出於公心下之奏報多任其私意或假公以市恩或乘機以償怨毀譽失真賢否失實其他弊端不一而足乞諭吏部榜示各官凡揭帖所報失實者連坐或有當黜而留者許本處撫按論奏有當黜而妄訴者亦罪之上曰朕以黜陟之典付吏

部吏部以賢否之實寄長吏使其所報失實則黜陟不公賢否無別何以示勸懲於是宜嚴連坐之罪其當黜而留與當黜而妄訴者俱如所言

二十三年正月吏部尚書李裕奏朝覲考察舊例有老疾罷軟貪酷素行不謹凡四而已第遲鈍似軟偏執似酷二者於老疾不謹復無所屬謂宜創立才力不及名目通前爲五凡考居才力不及者俱照品級降調簡僻衙門用朝廷以其有愛惜人力之意從之遂爲定例弘治元年十二月鎮國將軍楊譽奏撫按考察官員止據布按二司考語豈無親故仇嫌以致考察不公下吏部

嚴行挾私者罪之

六年正月吏部考察天下大小庶官當黜者幾二千人請如例罷黜并調用上曰諸考退官俱照舊例行其方面知府仍指陳老疾等項實跡以聞毋虛文泛言以致枉人府州以下有到任未及三年者亦通查具奏既而尚書王恕等各開具上請且言府州以下官有貪鄙無用者畱一日則民受一日之殃若必待三年而後黜之於彼固當感激於民未免怨嗟此殃民誤事官雖年淺亦不可不黜也 上曰人才難得事貴得實人貴改過祖宗愛惜人才凡百官考滿初任再任有平常不稱者

俱今復職必待九年然後黜降今或因一人無根之言而遂革其積勤所得之官使之泯然不敢伸理是豈治世所宜有爾等皆因襲舊弊不能改正今姑從所開具者處之其方面知府年老未滿六十有疾不妨治事素行不謹在陞任之先及見任不謹罷軟無爲非本官訪有實跡或有巡撫巡按只一處開報并其餘官員到任未及二年非老疾貪酷顯著俱畱治事今後朝覲之年先期行文布按二司考合屬撫按考方面年終具奏行下該衙門立案待來朝日從公詳審考察如有不公許其伸理其科道官必待吏部考察後有失當者方許指

名糾劾

八年奏准各處撫按會同從公考察布按二司并直隸府州縣各運司行太監苑馬寺等官賢否如無巡撫則巡按會同清軍或巡鹽考察其二司及守巡并府州縣司寺正官各訪所屬賢否開揭送撫按以憑稽考
三月山東撫按奏黜老疾不謹等官 上諭吏部曰到任未及二年者姑留辦事人才能否須歷任稍久方見今後有如此奏黜者本部酌量再奏

四月科道各疏言我朝朝覲考察最為精盡蓋委之撫按俾報其賢否又叅之布按及直隸州郡之長俾究其實部院又跡其歲報殿最以為去留之據如有不當科道得以劾之不才豈容幸免才能豈致冤抑近弘治六年奉有明詔如止委二司考合屬則恐未足以盡訪察之公如部院將所奏立案施行復恐致洩漏疎虞之弊如許考退者復行伸理則羣邪橫議之門何以塞之明年考察乞一依弘治三年以前故事天下幸甚部院因奉旨會議覆奏 上曰人才固不可輕進尤不可輕退苟不得其真所損多矣今後考察黜退官員務從公詢訪必得實跡不可輕信偏聽以致枉人

九年正月吏科都給事季源御史吳裕等上言近日吏部

考黜不職官員有漏網者如府尹冀綺及按察使趙鶴齡等十人之不謹知府喬縉等二人之老疾亦宜黜退部院因具各官歷年考語以聞上以各官考語無不謹貪酷俱畱辦事是年朝覲官陛辭上賜之勅內有云官之崇者任固重官之小者責亦專凡爾有司莫非天職勿以一事不修為無損勿以一民不獲為不足憂勿以一郡一邑不安為無害於治

十五年正月朝覲考察命有被黜奏辯者容內旨再覈實吏部尚書馬文升倉卒拜命欲改擬以從考功郎中楊旦持不可曰祖宗來未有此例且倖門一開後將謂何都御史戴珊亟是之文升亦悟竟覆止之

朝覲舉布政周孟中等六人議行各該撫按官員支給官錢買辦綵段羊酒等物仍於公堂設宴相待用示獎勵十七年五月勅吏部都察院比年考察朝覲官員率多撫按官考語多不得實爾等詢訪亦欠周詳以致賢否倒置明年正旦適當朝覲之期宜預行各撫按官從公開報爾等備細叅詳精白一心秉持公道庶幾澤被生民上回天意其欽承之

正德三年吏部考察朝覲官員浙江叅政梁澤等致仕江

西布政使李韶等閒住都勻知府黎臣爲民得允矣劉瑾忽附批學士吳儼帷薄不修令致仕養病御史楊南金無疾欺詐着爲民後有托病請假及丁憂違限不起復者通奏懲治

荆州知府某貪暴無比監司考語不敢署其惡吏部尚書許進奏爲民知府復賄劉瑾中批留用且命查其考語來看僚屬恐懼進乃查奏諸司考語而自署其後曰上司畏其挾制而考語欺天下民被其殘虐而怨聲動地知府後卒廢棄

八年令各處被災被兵地方許撫按官預先勘實具奏免

其正官朝覲若有科斂害民者仍許提問劾奏

九年朝覲舉布政陳恪等一十六人如弘治間周孟中事例舉行時擬賜宴禮部會宮寢惟灾方屬修省而止

令朝覲官各陳地方利病及處置方略吏部行各該衙門斟酌會議奏請施行

十二年正月吏部舉朝覲賢能官江西左布政張嶺等賜宴內府

十四年令考察存留官員內有才行兼優政蹟顯著及守已廉潔人無間言者行各撫按官買辦綵幣羊酒齋獎仍不次擢用

十五年吏部會都察院考察天下大小庶官以 上南巡
未奉定奪

嘉靖元年十二月給事中夏言疏言三年朝覲國家重典
皇上御極之二年實惟天下朝覲之期正治道作新之
機人心趨向之會宜申飭令典賢能者宜舉祖宗賜衣
賜宴之典貪贓者宜追奪誥勅及追見任俸錢令糴穀
上倉以備賑濟使貽譏鄉里以示恥辱則貪穢知所懼
御史朱實昌亦條陳考察以裨新政四事其一謹覈實
謂保薦考語須博訪精密其二表賢能謂吏有循良者
賜宴禮部不次超擢其三一制度謂考滿之後任滿官

考者出取親供不必回任給由其四均勞逸謂京官宜
補外而以方面之賢者入補卿寺略如漢刺史入爲三
公唐宰相出領方鎮之意 上是之

二年奏准方面知府正官考才力不及者照京官不及降
調例不許止議調簡

吏部言頃言官建議來朝百官治行稱最者請如 先朝
故事賜衣賜宴以寵異之臣等推訪治行廉能聲實卓
異者得布政王蓋孫祿張璉副使王廷相袁賓周廣魏
彬徐文華汪玉叅政顧璘鄭毅林富知府羅僑歐陽鐸
朱裳翟鵬俱可與旌獎之列但來朝者俱已回任請行

巡按遣人齎賜綵段羊酒用彰激勸報可

六年詔閑住教授王介錢子勲復用給事中解一貫等言
介等自知考察斥黜例不復敘乃假議禮以圖進用非
真忠於陛下者也今茲復用則是壞祖宗百年之
制且啟小人僥倖之門故尚書廖紀皆執以爲不可則
朝廷公議可見矣乞從部擬以爲罔上營私之戒吏部
亦謂考察黜者使得復用將來人相援附臣等無所據
守上乃從之

七年兵部尚書胡世寧言副使施儒楊必進皆邁衆奇才
吳禮行近古人皆爲大計黜不敘或謂例不再用也大
例非祖法而得才爲難况近來大計多權奸排擯若不
敘則忠勤解體上納之

八月給事申史立模疏言臣聞剛正者特立而見忌詭譎
者雜進而難防以見忌之君子而當難防之小人苟其
術得試其計得行雖至於空人之國亦無及耳本廉真
也而謂貪污本慈祥也而謂酷暴或指以閨門曖昧或
誣以暮夜苞苴或追論其平生或旁求其近似非出鄉
官之多口則緣吏胥之銷骨非昌言於廣坐則揭貼於
幽陰而巡史監司之考覈任喜怒以爲取舍者不與焉
往往以小人一時之言遂爲君子終身之玷修之歲年

而不足壞之頃刻而有餘請一切禁治。上是其言。詔部院持明秉公毋得偏聽。先申禁約。懸榜曉示。仍令緝事衙門巡城御史。但有投匿名文書者。密訪擒。罷閑革役官吏人等。潛住京師。大索逐之。期盡一月。舍者與旁舍不舉者。同坐。悉如立模疏行。已復諭吏部立模前有疏奏朕已施行。今復思之。似爲大臣拒絕人言。以箱天下之口。非人臣之道。且朝覲禁約事宜。祖宗俱有明旨。立模所奏多至紛擾難居。言路其調外用所行者。一切報罷。乃調立模判通州。

年先是。上諭部院令來朝府州縣官各陳所見。上之二司二司擇其可用者。類奏部院條議以聞。於是布政則山東鄭韶。福建查約。山西江曉。陝西胡忠。按察使則江西胡璉。廣西劉士元。廣西錢宏。福建副使王俊。民貴州參議周鎬。僉事朱佩。知府則長沙孫存。太原黃卿。建昌鄭源。煥寧南蔣山。開封劉璋。登州游璉。汝陽知縣白綱。徐聞縣丞林應。總各言時事。部院爲條上之。得旨所奏關係重大者。各該衙門議處。以聞其餘下各撫按官。徑自勘酌施行。

令吏部將賢能官員分別等第。奏聞優等官員查照舊例。奏請宴賞。給與誥勅。

十年十二月都御史汪鋹上言大計羣吏宜令部院考覈去畱至有當去不之去者方許南北臺諫官糾拾勿得先事陳劾以滋煩擾南京御史馮恩上疏力辯鋹言有不可者四因劾鋹鉗杜人言圖便已私爲大不忠上然之命遵舊例先事陳劾

十一年吏部尚書王瓊等言考察官吏載在累朝令甲止據三年任內事跡初非通考生平素行邇來往往苛求有已陞外官因前任京官而被黜者有已陞尊官因前任卑官而被黜者殊失惜才之意請今歲大計一遵舊例其有在任緣事等官亦當據其考語去畱不可輒議

罷斥詔如議

十四年吏部都察院覆議御史喬英條陳考察疏上曰朝覲考察係國家黜陟大典被黜者既不容奏辯又終其身不許敘用朝廷委任部院不爲不專近者徒事詢訪以致人得行私報復虧枉甚失朝廷公平正大之體今考察伊邇卿等務乘至公唯以撫按等官考語及科道官論劾爲據其一切曖昧影響事情毋輒聽信若撫按等官徇私賢否開具失真者卿等叅奏處治

給事中戚賢以考察有拾遺未聞有論抹近日大計儻有以賢見黜者臣等請與論抹伸其冤枉上曰賢所奏

亦是愛惜人材之意必須果有虧枉者方許已給事中薛宗鑑具言參議王臣韋商臣運同冷宗元縣丞葉洪枉狀乞詔還原職下吏部覆言王臣等不職匪直撫按言之卽南京科道業已具劾而宗鑑輒相牴牾挾私亂政不宜聽得旨考察係國家大典原無論揀事例今後不許援引宗鑑以有前旨姑宥之

十七年十一月 上諭吏部曰三六年大計係黜陟重典邇來權奸往往假借公法擯斥善類甚傷國體今後大計黜落官員果有正直廉潔才器超卓久爲公論所惜循私道官從公薦舉吏部議請起用以伸公道

十九年 御史童漢臣言副使張意知縣汪旦按臣皆論其贓方下有司驗問而二臣乃乘時考察詭言許奏流傳謗書鼓惑人聽宜禁治詔下部院從公考察今後敢有辯誣騰謗成書布市者錦衣衛捕繫之

給事中周采奏先朝考察擇有司之賢者賜宴及服一時吏治稱盛典禮久虛人鮮激勸宜申勅部院從公訪舉果有政績顯著者疏名上請宴賞一如令甲報可於是給事中陳邦修薦應朝官員可備旌賞者五人福建參議徐樾廣東參政張岳廣西參政翁萬達四川副使高賁亨副使蔣信 上以考察重典部院大臣自有公論

邦政敢先事妄與顯是阿私切責而宥之

七月給事中劉天直條奏朝覲六事一禁科歛一精考察一序勞績一止餽遺一處公廨一審黜陟部覆其言俱切時弊惟未二事未易遽舉宜從舊 詔以朝覲事宜有旨禁約者悉務舉行餘如議給事中邢如默亦以朝覲考察事宜條奏一公採訪一正體統一禁科求一上悉從其言 詔今後卽非朝覲之年而以虛言挾害人者厥衛捕治所司擅自受理扶同中傷者科道指實參奏已而御史魏謙吉言往年考察多存寬恕或惜其科第之高或矜其歷任之淺或取其年力之精壯或取其

辦事之微長或因請托之難拂或因根據之難動卽貪酷顯著亦曲爲庇畱雖重論不容亦止從量調在朝廷名爲宥過之仁在小民實貽剝膚之害乞勅令部院嚴加考覈但係貪酷者盡爲罷黜則苛刻之黨除長厚之吏進民困自甦盜賊自息矣 上覽疏稱賞以所言有愛民實意切中考察事情詔部院務秉至公力祛宿弊二十年正月大計天下羣吏有河南叅政王慎中吏部考中下奪官一級旣而命以不謹削籍時謂慎中先爲江西叅議侵學政有言於大學士言者故特旨斥逐云錢世賢者雲南人爲福建僉事以賍著清軍御史包節

國朝典彙卷三十九 朝野考察
發其事改別臬用已而大計黜之亾何包節巡按雲南
行部至郡世賢率廝養數十人突擁道側闌節輿詬辱
之節上其事下都察院行雲南巡撫劉渠收繫世賢及
廝養惡少俱論戍邊

給事中邢如默等御史陶欽夔等考察拾遺言布政劉勳
等各貪污不職乞行罷黜章下部院看議部院差次其
等得旨言官舉實各官過惡論法不止罷黜部院考
察如何輒遺劉勳林希元陳璣毛衢曹世盛王獻王傳
莊一俊陳仲錄辛東山俱罷職馬剔張國紀康河麥孟
陽俱爲民查應兆姜思依擬調川又以勳貪酷異常推

府尹未任又推邊方巡撫令吏部陳狀於是尚書許讚
等具疏引咎上復切責而宥之仍停俸一月已而邢
如默等因奏劉勳之陞因先任文選郎中王嘉賓急於
遷轉次第騰缺以爲已地故於劉勳之賢不肖地方之
宜與否不暇計也况其在部之日倖門大開去後物議
愈譟宜加黜罰爲人臣期速化濫美職之戒上責如
默等不先事陳說調嘉賓漢中府推官

二十一年吏部覆給事中沈良才奏近年考察才力不
者例回籍候調不得赴部以故一涉瑕釁隨即淪沒名
雖調用實類罷閒非所以愛惜人才請今後撫按奏劾

及經考察宜候調者俱令赴部需選庶於使過之義明而人才無壅也從之

二十五年吏部覆御史陳爝條奏朝覲考察八事重激勸慎改調杜私交究規避嚴查覈禁科歛遵典禮省繁文得旨允行

吏部尚書唐龍等以明年復當考察請如例責撫按官具有司賢否先期奏報上命申諭撫按官務秉執公明甄別淑慝毋得徇私傷善庇惡尤宜愛惜人材允合公議如考語有臧否懸異者部院仍照舉劾不同例指實叅究

二十六年二月天下朝覲官陞辭賜之勅曰朕纘承丕基撫御方夏二十六載於茲任大責重宵旰兢兢永惟四方萬國豈予一人所能徧察所冀承流宣化與我共理者其惟諸藩臬郡有司乎爾天下來朝大小官員除不職者已令部院以法降黜外爾等仍還舊職其各仰體朕奉天保民圖登至治之意惟仁以愛民勤以建事忠以體國廉以守身斯爲稱職無黷貨肆無淫刑以逞無阿諛以干進無欺詐以飾名有一於茲足以傷和害治國有嚴憲將不爾貫爾等其勉之戒之旣而給事中陳棐將勅諭衍作官箴十章上之上曰陳棐舞弄文

墨輒欲將此並勅令風示在外臣工甚爲狂僭乃令陳
狀斐引罪命降調外用

二十八年七月南京給事中李萬實條上考察四事一言
優異才治行卓絕者宜賜璽書宴賚二言嚴汰黜貪酷
者宜追奪誥勅逮治贓罪不及者宜降級調用以示懲
創三言信禁令禁絕餽遺令甲甚明宜嚴緝訪四言杜
倖門朝覲被黜不許奏辯疏下所司

三十一年十二月給事中何雲雁疏陳考察六事一稽考
語以防欺誤二究逃官以懲不恪三禁餽遺以警官邪
四止許奏以端士風五旌異能以昭激勸六飭法典以
肅遠人吏部覆言後四事人所常言前二事亦可採用
上合行之

三十三年正月吏部言先年方面考察才力不及者例以
原職赴部調簡自回籍聽降之法立而吏有終身淪廢
者矣且方面有司同一考察而一則槩從寬使猶得以
拾級而升一則旣絕其赴部之期又從以降級之罰使
各官無階自進而本部無缺可補聖世平明之治不宜
如此乞仍復舊例以廣器使之途得旨考察不及官員
如議一體赴部以原職降簡

三十四年十二月吏科給事中王鶴等奏今天下奔競者

莫甚於方面而驕橫者莫甚於進士之有司今撫按初到或陞代及節且兩司紛紛謁賀往來道路無寧時廩給夫馬重困里甲乞於今歲考察每省摘其尤者一二入照不謹例閑住以示懲創頃以地方多事奏請多選進士充守令初至率矯情節詐欺誑監司而監司輒薦揚之既得薦揚貪酷並作無復顧忌茲遇考察大典乞勅該部痛懲前弊凡輿論不平奸橫有跡者雖監司所上吏計列在優品亦行罷黜得旨奔競驕橫近年積弊部院嚴加考察以正士風如或徇情隱漏科道官從實拾遺糾奏毋得畏避

四十年六月吏部言舊制朝覲考察之期凡撫按論劾官員非係用兵重地暫停議覆所以重大計一法令也第各官一經指摘多甘心自棄不復砥礪留之反爲民害是宜明開自新之條令撫按廉其省愆悔過治績可採者卽註與優考以憑一體存留庶中才有轉移之機不至播惡爲生民害報可

四十二年六月南京給事中楊銓等條奏考課四事一曰嚴考註言有一人之身舉刺互異宜視所舉刺之人舉者賢必非比周刺者賢必非註誤因是折衷衆論叅驗是非則臧否弗眩二曰嚴問詰言大計時常例得面質

賢否宜忽舉一二事以問令對者不暇經思則欺偽無所容而情實立見三日察卑官言府佐以下考語含糊率難甄別槩以俸深爲年老新任爲稱職非辨官材之道宜加意綜覈分別良庸四曰減黜額言比者競爲刻核黜汰務倍往昔非愛惜人之意宜稍從寬惟其人

四十三年十一月給事中趙灼疏陳考察四事一定取舍二酌降調三破常格四抑浮言 詔從其議

四十四年三月吏部尚書嚴訥等言今年朝覲考察之後已將存留官員資望相應者量才推用猶懼襟流冗職

尚有遺良乃創立訪單發來朝官令各舉所屬府佐以下治行卓異者送部議處蓋位卑祿薄之臣或自棄於進步之有限或自懈其作興之無由苟且墮惰無足過責而中有克自樹立者非豪傑不能也故國初有以典史擢都御史如馮堅以直廳歷布政如王興宗者臣亦欲做此意間超擢一二以鼓其志如此則其斥幽也觀典之外又施於不測其陟明也資格之外又加以非常清明盛治裨益不小 上從之乃以潮州府同知王化爲廣東僉事鳳陽府同知江東爲陝西僉事辰州府通判邵元美爲四川僉事

以上舉人

廣安知州張澤爲雲南僉

事貢 激浦教諭李珙為評事貢 碣石衛經歷郭文通為

肇慶府同知吏員

隆慶二年給事中張鹵等請及今天下諸司入覲時按行祖宗故事果有廉能卓異者特賜宴賚以風勵人心無論藩臬守令及佐貳以下皆疏名上請吏部覆言洪武永樂間官多久任政績已成故宴賚之典行而與者無愧色不與者無異議其後官不久任名不稱實故天弘治中間一舉行旋復報罷以今較昔又大不侔宴之舉未可輕議第擇其屢經薦舉允愜輿情者如正十四年例行撫按給賞綵段羊酒以示勸獎從之

陝西副使姜子羔言入覲官各有道里費及餽遺私齎宜令進獻羨餘以佐國計 上曰進獻非事體朝廷亦不藉此足用不許第以諸司路費皆取諸民令御史查照原給銀數追收貯庫自後進表朝覲官更不得多給累民

都察院覆御史張檟言近奉明旨裁革入覲官路費誠恤民省費但官有崇卑恐俸入不足克費未免取償於民自今宜照地遠近酌議定規通行遵守如雲貴兩廣福建二司百五十兩府官百兩州縣官六十兩首領三十兩江浙湖川陝二司百二十兩府官八十兩州縣官四

十兩首領二十五兩河南山東西并南北直隸二司八十兩府官六十兩州縣官三十兩首領一十五兩進表官住京月日比之朝覲甚少宜依省分量給其半得旨朝覲進表官既有盤費銀不許仍前擅用勘合騷擾驛遞撫按官亦不得徇情給與違者聽科道官叅治

四年題准兩廣見在用兵要查某處事勢危急及各省地方果有災傷賊情事勢重大正官必不可缺者量留數員料理其一切零賊小災及兩廣不用兵郡縣俱要責令依期入覲

吏部覆南京科道王禎王嘉賓等條陳考察事宜可行者

六一集衆論以辨人才一嚴考校以公黜陟一嚴旌勸以昭勸懲一明須知以責實政一寬黜陟以惜人才一審聽聞以求至當一抑奔競以防私弊 命如議行

掌吏部大學士高拱等言數十年來考察懲汰之數大較前後不相上下以是襲爲故常其數旣足雖有不肖姑置勿論其數不足雖無其人強索以克乃其稱爲不肖者又多苛求隱細苟應故事而所謂大奸大惡者或有所不敢問或有所不能識縱豺狼於當道覓狐鼠以塞責此人心所不服也又考察半歲之前撫按論劾俱不題覆夫爲不善者方其不露猶或有微倖之心少存顧

忌明知必去則將無所不至矣而乃留之半歲民何以堪自今撫按官凡有糾劾疏既具卽革任聽處疏下卽覆其去者如考察例不得復用其留者檄到乃復至於考察懲汰必大奸惡一切隱細勿論斥去不肖從其多寡惟求至當毋襲故常 上是之諭拱等曰朝覲在邇糾劾宜公自朕卽位四年科道官放肆欺亂朝綱其有奸邪不職卿等嚴考察詳實以聞

拱又言外官才力不及者槩以不及則銓補之日尚得遷就自今方面有才不宜於地者當移其地不易其官署曰調簡僻有官不稱其才者雖易其官當仍其品署曰

調閑散亦有操守未壞性氣稍偏而尚有他長可錄年勞當敘者署曰降級或才力不宜有司文學猶堪造士者署曰改敘此四者皆麗不及之條者也至於先已調簡再考不及者此終難策勵卽如給事中韓楫議從罷斥直署罷軟之下奏可

五年正月賜賢能卓異按察使楊綵副使勞堪江一麟僉事蕭大亨知府丁應璧徐學古侯必登李渭高文薦同知章時鸞知州許希孟知縣林會春徐成位曹大埜劉不息十五人各衣一襲鈔百錠以朝覲至者宴於禮部下貪酷知府徐必進等二十五人御史提問追贓

是年不謹內有副使顏鯨後屢經薦劾詔復其職
 吏科韓楫等言諸臣以卓異得賜宴者宜超擢以示風勸
 其遷敘未久者量加服俸及首克行取之選今大察後
 州縣有缺乞毋論遠近無拘科貢盡行銓補以漸圖久
 任吏部覆如其言請行各省撫按官歲薦卓異數人以
 備大計有私濫者該科彈治之謂著為令 上曰可

國朝典彙卷四十

都察院右僉都御史

臣徐學聚

編輯

詹事府詹事兼翰林院侍讀學士

臣劉鴻訓

訂正

吏部

九

薦舉

甲辰 上謂廷臣曰元本胡人起自沙漠一旦據有中國
 混一海內建國之初輔弼之臣率皆賢達所進用者又
 皆君子是以政治翕然可觀其後小人擅權奸邪競進
 舉用親舊結為親黨中外百司貪婪無恥由是法度日
 弛紀綱不振至於土崩瓦解卒不可救今創業之初若

不嚴立法度以革奸弊將恐百司因循故習不能振舉故必選用賢能以隆治化爾等有所薦引當慎所擇

吳元年十一月 上謂侍臣曰吾昨觀輿地圖所得州縣天下三分已有其二若得材識賢俊之士布列中外佐吾致治吾以一心統其紀綱羣臣以衆力贊襄庶政使弊革法彰民安物阜混一之業可以坐致古語云國無仁賢則國空虛爾等其各舉賢才以資任用

洪武元年 詔懷才抱德之士所在官司用心詢訪其實申達以憑禮聘蒙古色目人果有才能一體擢用

二年九月 上謂廷臣曰知人固難今朕屢勅百司訪求賢才然至者往往名實不副豈非舉者之濫乎廷臣對曰請自今令百司薦舉必具其所行之善庶無冒濫之失 上曰觀人之法卽其小可以知其大察其微可以見其著視其不爲可以知其所爲但嚴舉措之法則冒濫自革矣

六年二月命暫停科舉別令有司察舉賢才

四月 上命吏部訪求天下賢才論之曰世有賢才國之寶也古之聖王恒汲汲於求賢蓋賢才不備不足以爲治鴻鵠之能遠舉者爲其有羽翼也蛟龍之能騰躍者爲其有鱗鬣也人君之能致治者爲其有賢人而爲之

輔也今山林之士豈無德行文藝之可稱者宜令有司
采舉備禮遣送至京朕將任用以圖至治
十三年二月詔舉聰明正直孝弟力田賢良方正文學術
數之士至京者八百六十餘人命各授以官
四月命羣臣各舉所知論之曰天下賢才未嘗乏也謂臯
夔稷契不復生方叔召虎不再出是薄天下之士也但
世有升降故才有等差爲人上者能量才授職則無施
不可蓋士之進退係乎國之治否吾以一人之智豈足
以盡理天下必賴天下之賢然後足以有爲爾等宜體
此意各舉所知以聞

十五年正月命天下朝覲官各舉所知一人

八月有廣東儒士上治平策者 上覽之顧謂侍臣曰此

人不識道理豈有涉數千言論治而不及用賢天下之
大欲朕一人自理之乎雖有至聖之君猶以用人爲重
曷嘗謂人無足用也蓋獨智自用則所見者狹資賢而
任則所及者廣學士宋訥對曰誠如聖論但賢才之在
天下在上豈能周知必賴羣臣薦舉然得賢與否係夫
舉之者何如耳 上曰小人所舉未必爲君子君子所
舉未必爲小人故觀其所舉者即可知其人賢否矣
左春坊正字魏德壽舉文學汪叔瑜等詔有司各以楮幣

聘之

十六年武英殿大學士吳伯宗以薦舉失人降為檢討

十七年令知州知縣等官會同境內耆宿長者訪求德行

聲名著於州里之人先從鄰里保舉有司再驗言貌書

判方許進呈若不行公同精選者坐以重罪

十二月上諭侍臣曰孔子云十室之邑必有忠信朕屢

勅有司薦舉賢才而所薦者多非其人豈山林岩穴真

無賢者乎特在位者弗體朕意濫舉以塞責耳昔常河

薦馬周唐太宗喜其有知人之明今薦舉者若能致一

馬周朕豈愛爵賞備無以副朕望者是以延佇之心朝

夕不忘

十八年十二月詔舉孝廉之士

十九年七月詔舉經明行修練達時務之士年七十以上

者郡縣禮送京師上諭禮部郎中鄭居貞曰古之老

者雖不任以政至於咨詢謀謨則老者閱歷多而見聞


廣達於事情周於物理有可資者居貞對曰人至六十

精力衰耗則不能勝事請六十以上者不遣上曰正

為比來有司不體朕意士有耆年便置不問豈知老成

古人所重文王用呂尚而興穆公不聽蹇叔而敗伏生

雖老猶足傳經豈可概以耄而棄之也若年六十以上



七十以下者當置翰林以備顧問四十以上六十以下者則於六部及布政使司按察司用之

二十年 上諭禮部臣曰朕向者令有司舉聰明正直之士至者多非其人甚孤所望朕聞古者選用孝廉孝者忠厚豈第廉者潔已清修如此則能愛人守法可以從政矣其令州縣凡民有孝廉之行著聞鄉里者正官與耆民以禮遣送京師非其人勿濫舉

二十五年十二月安慶府知事周昌言臣見士人或因小過罷斥然其才有堪用而於例不得舉宜垂寬宥令有司得薦起之吏部奏言有罪復用無以示懲昌言不可

聽 上曰良工琢玉不棄小瑕朝廷用人必赦小過苟因一事之失而棄一人則天下無全人矣昌言是其會
有司凡士人因小過罷黜及遷謫遠方者如其才德果優竝聽舉用

二十六年令凡各府州縣每選拔選容止端謹無過人材一名申送布按二司考覆堪充歲貢送部應有賢良方正及山林岩穴隱逸之士并通曉經書儒士秀才孝廉者各訪求送部選用如將鄙陋不堪之人一概朦朧濫舉原舉官吏依貢舉非其人律問罪

七月左春坊大學士董倫薦肇州吏目諸葛伯衡學行擢

陝西叅議

三十一年閏五月建文詔內外五品以上文官及縣令薦賢才定保舉連坐法

七月給事徐澄御史黃凱薦王紳文學孝行授國子博士十二月詔內外羣臣各舉山林岩穴懷材抱德之士應天府尹何寶翰林學士董倫薦奏計入京馬龍他都甸長官吏目程本立學行政事宜留中朝從之

建文元年十二月蘇州知府姚善薦處士錢芹授兵部司務署行軍斷事從大將軍諮議軍事

二年十二月詔舉優通文學之士以處士唐愚士爲侍讀以方孝孺薦也

四年七月成祖詔吏部及翰林舉文學行誼才識之士永樂元年九月勅吏部曰朕以眇躬嗣成大統圖惟求賢以資治理宵旰遑遑急於饑渴其令內外諸司於羣臣百姓之中各舉所知或堪重任而沉滯下僚或可繁劇而優游散地或抱道懷才隱居田里竝以名聞毋媚嫉蔽賢妨徇私濫舉書曰舉能其官惟爾之能稱匪其人惟爾不任欽哉

十月擢浙江舉懷才抱德之士任守禮爲戶科給事中二年三月吏部尚書蹇義等奏有千戶奏薦士初朝廷命

文臣舉懷才抱德者武臣不與命千戶違制宜罪之
上曰朝廷下令求賢武臣不與命者蓋慮其不學昧於
知人今能薦士亦是忠君愛國之心不用罪之昔馬周
因常何而進今所薦者亦徵來如試之果有才一體授
官不則罷之

九年閏十二月吏部尚書蹇義同六部等官上言在外布
按二司府州縣官職在承流宣化以撫字爲職必須得
人得入之道在銓選精嚴薦舉有法宜令在內文職七
品以上在外五品以上及縣正官各舉所知賢能廉幹
堪任牧民及居風憲者一人吏部考驗如果賢能量材

擢用其所保非才或授職之後闕茸貪污舉主連坐
上是其言命所司速行之

十八年正月擢薦舉人才馬麟等十三人爲布政等官

詳布政司

二十一年初令五品以上京官得薦士禮部郎中况鍾薦
右中允張宗璉 上召問楊士奇曰人皆薦下僚鍾乃
薦朕宮臣耶對曰臣與王直擬薦宗璉不意爲鍾所先
上喜曰鍾能知宗璉耶卽日升宗璉大理寺丞

二十二年十月 仁宗命吏部令在京七品在外五品以
上文官及知縣於五品以下見任官及軍民中訪舉德
性淳篤行止端方或材能出衆政績顯著或文學有稱

識見優遠者量材擢用若有蔽賢及濫舉者論罪如律所舉之人後犯賊罪舉者連坐

洪熙元年八月 宣宗勅諭吏部令在京五品以上及監察御史給事中在外布按二司正佐官及府州縣正官各薦所知務合至公以資實用如所舉之人有犯賊罪者連坐

十月都御史劉觀王彰李素舉才能之士前應天府尹于潛等十餘人 上曰卿大臣所舉必當昔孫林言吾輔政無功惟薦一二臺臣無愧卿等必能知此復諭之曰古者除官則署舉主姓名貪穢則連坐今亦當循此法

宣德元年十二月大學士楊士奇薦行人王翱為御史三年正月朔州知府張復奏舉軍中子弟楊鑑等有志操堪任使吏部言舊無舉武人子弟例 上曰古人出貧賤中任大事成大功者多有之安知軍伍中無才能其召至京考察

四月 上諭吏部曰唐堯用人猶必試可乃已况於後世更當詳慎朕下詔求賢四方薦舉來者甚衆卿等未嘗考察豈能知其賢否而輒授以官欲官皆得人難矣今未授者必會官考試取其可者用之已授官者俟考滿至日試之如例試不中者黜之

四年四月兵部尚書張本奏舉前刑部員外徐琦職方司
辦事人才陳孜乞授本部屬官上命琦爲職方員外
孜主事謂吏部曰近來人才未便與六品京官但張本
廉謹所舉必當故從之他有舉者必會官考試然後量
授以職

五年上與學士楊溥等語及治民之事曰民之休戚係
乎庶官之賢否何術可盡得其人溥對曰嚴薦舉精考
課不患不得曰近代有罪舉主之法大抵全才者少明
此者或不明於彼善始者或不善於終而一言薦之豈
能保其終身故亦難乎舉之者矣大抵欲得賢才當厚

教養之法教養有道人才自出若但責效於薦舉考課
之間蓋求什一於千百也漢董仲舒言素不養士而欲
求賢譬猶不琢玉而求文采此誠知本之論

六年上勅諭吏部曰致理之方用賢爲要事君之道薦
賢爲忠朕主宰天下思惟負荷之重必得賢才共圖治
理夙夜在念寢食不忘嘗勅朝臣三品以上舉薦所知
又出示招隱猗蘭之作庶幾羣臣咸明朕志近惟一二
近臣曾有舉薦其餘曠時積月不舉一人豈果無遺賢
歟抑今中外所用皆得人歟豈典銓衡者之怠忽也朕
以誠心求賢望理不圖臣下玩爲虛文孔子曰十室之

國朝典彙卷四十一 廣舉 四十六
邑必有忠信况今天下之廣生民之衆乎爾吏部卽會
在京三品以上官衆議推舉有才行者有文學者具名
來聞朕擢用之毋徇私濫舉塞責

四月吏部奏求賢所舉官四十三人例當會官考試中有
南試海衛餘丁難與考例 上曰古人立賢無方耕釣
之中有王佐才其可以軍丁棄之命考試如例

七年三月勅論文武羣臣曰當春時和萬物發生顧念兵
民有未得所爰歎懷保之政爾羣臣宜同朕志布政司
按察司及知府知州知縣得其人則政理民安該部往
往循資陞授不免賢否混淆自今前項職事有缺吏部

行移在京三品以上官保舉又各處有文學才行出衆
之士自二十五歲以上令所在有司及布政司按察司
堂上官連名保舉赴京選用後犯贓罪并罰舉者

八月 上御奉天門視朝罷召楊士奇楊榮至榻前諭曰
今春命京官三品以上者舉方面郡守後又出舊作招
五隱猗蘭之詩以示意已踰半歲都不舉一人近因卿二
人舉黎恬等朕思今天下之廣豈無人才但羣臣不以
八國家生民爲心又兼以忌嫉注念故往往視朕言爲虛
文吏部怠忽至此其降勅責之

以考功員外魏驥爲南京太常少卿交趾南靈州黎恬爲

右諭德建安縣教諭楊壽夫臨清縣教諭彭琉爲編修以京官所薦也

八年九月詔各布政司按察司府州縣官連名保舉賢良方正一人起送吏部量才擢官

正統元年正月楊士奇以待講劉永清才堪繁劇薦爲廣東右布政

十一月勅吏部選舉御史曰在外按察司缺官已有推舉之令在內監察御史尚多缺人今後在京三品以上官各舉一員除見在縣令不舉外其餘爾吏部精加體訪必得廉潔公正明達事體詳慎平恕具名奏授如授官

之後但犯貪淫暴刻及庸懦闒茸併罪舉者

又勅吏部凡親民之官縣令最切必得其人庶民乃安自今各處知縣有缺令在京各衙門四品官及國子監翰林院堂上官各部郎中員外郎六科掌科給事中各道掌道御史各舉一員爾吏部亦精加體訪必得廉潔公平寬厚愛民者具奏除授如授官之後但犯貪淫暴刻及罷軟不勝任併坐舉者

二年九月楊士奇上疏言宣德七年以前藩臬二司及府州正官惟聽吏部所舉權衡獨擅聞見不廣未盡得人百姓受害是以宣宗勅令大臣保舉自茲得人遂多

間有一二非才蓋緣舉主審察不至亦或徇私不公所致昔唐太宗命在京三品以上官舉郡守縣令後來致天下斗米三錢之效近年有等京官無人舉保造爲謗語專欲隳壞先帝良法伏望聖斷仍遵先帝勅旨行但所舉之人籍記舉主後有犯賊必明正舉主之罪則人知謹畏不敢徇私官必得人矣詔從其議

四年五月大學士楊溥薦江陵知縣范理爲德安知府溥在內閣其子自鄉來云道出江陵獨不爲縣令所禮乃天台范理也溥深重之卽薦擢知府再擢貴州左右政或勸當致書謝理曰宰相與朝廷用人非私干理也

溥卒乃祭而哭之以謝知己

十一月刑部侍郎何文淵薦兵部主事孫隆爲徽州知府五年十月上慮各官所薦或有浮躁之人夤緣假託而進者令吏部廉覆務循至公尚書郭璉等言各官所舉如御史蕭清等五人不能協輿論上曰舉當者擢用不當者舉主罰俸兩月人臣以薦賢爲忠繼今有推延不薦及薦而未當者爾卽以聞不可有所觀望遷就以孤朕求賢圖治之意尚書王直奏謂三品以上官官各舉十二月命進士舉人監生吏員官聽諸司保舉十四年令下僚有才能出衆者聽風憲官及上司薦舉

六月令三品以上京朝官及風憲官薦舉賢才
九月給事中程信薦薛瑄為大理寺丞分守北門

景泰元年二月吏部尚書王直奏罷三品以上京官各舉所知例聽吏部自擢從之

詔司府州縣正官及風憲官舉保懷才抱德及通今博古文章超卓名行相稱之人赴京考用不許濫舉

二年十月御史劉孜薦南大理寺卿薛瑄粹學飭躬進無所求退無所累實君子之儒不宜置之閑遠乞召供館

閣之職俾講學輔導必有裨益
上曰內閣本朕倚任非人所得薦不許

三年二月詔各處見任官員有才行政事優長屈在下僚及有文學才行堪授職任之士隱於民間及官員罷職

委無贓犯重情而才學可用者竝聽在京四品以上在外撫按方面并府州縣正官舉薦赴京考用所舉之人

後犯贓罪連坐舉主

七年三月御史閣鶴請令在京堂上官并給事中御史在外責之撫按有不行推訪及舉主徇私濫舉者罪之吏

部以聞從之

天順元年詔處士中有學貫天人材堪經濟隱居高蹈不求聞達者所司其實奏聞

三年二月大學士李賢薦布政陸瑜為刑部尚書石亨以私譖之久不召對及瑜至當擬旨到任同事者謂且擬侍郎賢曰吾以尚書薦而改擬侍郎則自慊不信矣竟擬尚書從之後瑜頗稱旨乃復召對如舊舉

八年八月六科十三道皆言漕運總督王竑宣府巡撫李秉可大用詔下廷議尚書王翱大學士李賢等皆以為然上曰古之人君夢卜求賢今獨不能因輿論所予者而用之乎王竑李秉廷議皆以為可大用朕因而用之何必夢卜耶以竑為兵部尚書秉左都御史

成化元年五月兵部尚書王竑薦張寧岳正九卿會推用

之內批二人皆知外郡竑遂以疾辭致仕

二年正月令三品以上京官薦舉堪任布按二司官者

四年上命今後京堂四品以上吏部具缺朕自簡除方面照正統間保舉吏科給事中沈瑤等奏四品以上官陛下既親簡除矣在外方面又各保舉則吏部所司者何事宜令吏部遇京堂員缺會同內閣推舉若方面員缺會同三品以上官保舉上命吏部通查典故以聞曰祖宗舊規如此御史給事中乃不欲朕舉行何耶其究治之廷臣不敢復言

六年六月詔罷會官保舉

十七年十月廣東左布政彭韶薦舉人陳獻章下部知之
二十三年詔天下有司官員有才行超卓許六部都通大
堂上官及各撫按官舉保

弘治三年閏九月禮部侍郎倪岳薦山東叅政韓文才行
超陞雲南左布政

十月南京工部侍郎黃孔昭薦舉異才樊瑩章懋下所司
舉之

西一年令府州縣正官保舉山林隱逸之士懷才抱德經
明行修衆所推服者從巡按及布按二司官覈實奏送
吏部量才擢用如所舉不當保勘官員一體叅究

詔兩京科道部屬等衙門官堪任知府方面者各部都察
院堂上官各舉一二人

十六年令各處撫按及布按二司官訪察所屬廉能幹濟
者明開堪任某官具奏陞用

正德元年南京十三道言知府獻諛而薦尚書御史進諂
而保太監甚者都御史柳應辰爲太監劉瑯保留江西
叅政王綸爲太監董讓旌舉士習大壞有傷國體

八年令兩京堂上官五品以上及在外撫按布按二司正
官各舉賢能出衆堪任守令之人具奏選用又奏准在
京在外堪任知府者許兩京文職三品以上各舉所知

後照所舉旌勞連坐

十六年四月給事中孫懋等言逆濠既誅而首折奸萌如御史周廣范輅給事中陳鼎或謫下位或列編氓非所以彰曲突徙薪之賞編修王思給事中張原御史徐文華主事李忠修撰舒芬郎中張衍瑞姜龍黃鞏孫鳳陸俸員外夏良勝主事萬潮林大輅蔣山卿博士陳九川寺正周叙行人巴思明等各以直言蒙謫宜召還擢用以爲忠良之勸會御史郭楠亦以爲言詔下吏部行之八月巡按江西御史唐龍言給事中劉漑以劾奏逆瑾奸惡被杖幾歿落職爲民及瑾誅起任金華知府又以守

正不能事上官被廢可惜得旨下吏部酌量起用

十二月巡撫湖廣都御史席書奏致仕吏部尚書楊一清明習典故諳練機宜在臺省能處大事在邊鎮能決大機宜起赴闕廷處以使相俾之經略西北必有遠猷上命待缺起用不必煩以邊事御史張欽言臣見言者多薦一清陛下綸音特允誠求舊之典但輔相不以才識爲先而以誠實爲貴一清多知故典洞曉事情此其美也而昔事先帝紹權納賄無至誠感動之實宜爲酌處疏下所司

嘉靖二年刑部尚書林俊言祭酒魯鐸道足以鎮雅黜浮

學足以廉頑立懦不宜聽其養疾疏下所司
延綏巡撫姚鏞言往者逆瑾弄權尚書韓文等以諫獲罪
自後莫敢言者而給事中劉漑評事羅僑獨昌言之及
錢寧復起禍不滅瑾亦無敢嬰其鋒者而布政使方良
永給事中張原獨昌言之四臣可謂獨奮孤忠者也今
良永僅陞都御史終養而漑等未蒙除擢非所以風厲
天下詔下吏部議

應天巡撫吳廷舉疏薦晉江知縣梁景行究心理學篤行
古道乞不次顯擢以示勸前廷舉嘗兩薦景行至是復
薦時景行服闋家居 上命吏部召用之

四年吳廷舉薦新建伯王守仁文武全才宜暫掌南京都
督府事兵部議以文臣掌府未便俟別缺推用從之
二月禮部尚書席書奏薦楊一清王守仁文武兼資堪任
將相今一清已督三邊守仁當處之內閣無爲忌者所
抑且云今諸大臣多中材無足與計天下事者定亂濟
時非守仁不可 上不許曰近日邊方多事已命廷臣
集議席書身爲大臣果有謨略宜卽悉心敷奏共濟時
艱何必自諉中材有負委任

五年八月御史朱豹言近來各處知府多肆貪殘誠心愛
民者少請令兩京文職四品以上翰林五品等官各舉

所知下吏部編記成籍詢訪相符候有知府員缺陞補
審其果賢不妨久任超擢或薦不得人連坐舉主疏下
吏部覆如豹言仍請上籍名禁中視其賢者親擢以
鼓舞之命如議行

六年禮部侍郎方獻夫以兩京堂上及各處方面員缺數
多疏薦布政使汪鉉等六人按察司劉士元等三人叅
政黃昭道三人叅議王俊民等三人知府何鰲等養病
致仕降調爲民魯鐸等二十五人上以屬吏部合更
加查訪斟酌舉用

御史陳察既陞南太僕少卿具疏辭因薦原任給事中
世揚等二十餘人宜亟召用上以察久居言路職在
激揚既有所見自宜早陳今陞用不卽拜命乃泛舉多
人以市恩要譽姑從寬降雜職遠方御史初杲等連章
乞宥察不報已而給事中王俊民鄭一鵬傅良諫復論
救上責其朋比各奪俸二月察降海陽教諭

七月吏部尚書桂萼力薦王瓊當復用御史胡松劾其舉
用非人庇黨固位上以舉用人材朝廷自有斟酌責
松妄言而黜之未幾萼復薦瓊前以力攻楊廷和朝臣
羣起而非之卒無事實今邊方戒嚴兵疲糧乏而諸才
力無如瓊比惟其才高故忌之者衆皇上幸察瓊無

罪而起之。上命先復瓊職令吏部遇缺推用。

七年大學士楊一清舉賢才議上上曰此當今急務宜虛心延訪公聽詳察才苟可用疏名上請仍通行兩京大

臣及科道官各舉所知聽吏部叅酌擬議以聞。

御史馬津言新建伯王守仁忠貞濟世在在有聲功高人忌請召置廟堂以慰民望。上以兩廣未寧守仁方有事重寄津妄奏瀆擾切責而宥之。

八年二月吏部奏原任都御史林茂達叅政羅僑秦文副使田登陳和許雲鵬張思齊知府張紘田嵩通判曾確知縣張叅皆一時入望屢經薦舉並宜錄用。上謂起

廢官員必才行卓異乃可服人令其實以聞吏部覆奏比來士風競於功利廉恥道喪獨前數臣潔身勇退臣等從公察舉以仰順。皇上廉貪激頑之意非有他也。上是其言命酌量起用。

命兩京大臣科道及在外撫按官用心詢訪才行老成繫時望者從公各舉所知吏部遇有員缺酌量舉用毋避嫌推托亦勿徇情濫舉從給事中劉世揚請也。

五月御史毛鳳韶言古者大臣求退必薦賢以自代苟所代不如其人則寧仍其舊慎之也邇來會推之典不爲不公而論者乃謂特循故事臣以爲有三患人才難得

之患知人甚難之患觀望顧忌之患乞自今令大臣舉人自代下之廷議參酌可否如其未宜仍又別推庶大臣得人而無數易之患又如侍郎何瑋郭樸正大足以厚風俗廉貞忠靜足以勵貪懦今雖在告宜賜慰留上納其言詔自後推用大臣必衆論共與者何瑋令病痊卽起視事

吏部遵奉勅諭條奏五事內一精選任乞令兩京文職四品以上翰林院五品在外三品以上各舉堪任知府者一人兩京文職并在外五品以上翰林科道各舉任知州知縣者一人所與不拘進士舉監吏員出身日後舉

能其官或舉非其人及不舉者一體旌賞連坐一嚴旌舉京外官薦舉所知後以貪賂敗舉主降調犯在舉後者罰俸三次者褫其官其有政蹟卓異者舉主賜璽書褒諭或增秩賜金以賞之上曰卿等所言無非欲慎重守令前勅旨已開載明悉宜以實奉行以副朕知人安民至意

吏部覆南京科道所薦舊臣如尚書羅欽順秦金趙璜皆耆德宿望久孚士論宜及時起廢其次則副都御史王蓋張雲亦可叙用其次則尚書顏頤壽副都御史劉文莊侍郎孟春劉玉王啓大理卿湯沐太僕卿汪玄錫俱

以大獄褫職而侍郎鄭岳則嘗招物議宜用與否皆請上裁上曰奏內各官皆非可用之人惟張雲謹厚准候缺推用餘罷之

十年正月巡按雲貴御史陸夢韓疏舉原任尚書羅欽順秦金鄒文盛趙璜王承裕侍郎鄭岳劉玉都御史何瑋王堯封宜位卿相尚寶司卿呂柟郎中鄒守益布政使邵銳叅議陸鉞宜居侍從僉都御史毛伯溫張九叙通政李元吉馬理楊谷大理少卿顧必布政使蔡潮王浚顧應祥宜貳九卿給事中張嵩鄭一鵬御史王以旂倫以諒朱澗馬明衡宜處臺諫副使鄭元費裕中僉事江

暉汪應軫推官劉臬知縣李本宜補藩臬上以御史薦舉止當及境內人才夢韓乃不分賢否存亾泛引三十餘人下都察院叅看院覆江暉業已物故夢韓疏亦及之其言之無據亦可類見坐以濫舉之罪夫復何辭第其所舉多非見任及散在四方擬以近例亦似未合乃謫夢韓安慶府推官

十一年吏部言往歲奉有詔令群臣各訪所在有懷奇抱異伏在岩穴者從公薦舉以備錄用迄今年餘竟無一人至者請行各撫按嚴限促之仍令兩來五品以上文臣及科道官各舉所知具奏報可

給事中維昂薦原任尚書羅欽順趙璜王承裕都御史姚
鏞侍郎何瑋通政馬理祭酒崔銑皆海內名德宜及時
召用以究其蘊復言尚寶卿呂柟太僕少卿穆孔暉並
忠信端方不宜置之散地詔責昂徇私妄舉奪俸一年
十二年吏部疏舉閒住左都御史姚鏞服闋刑部侍郎寇
天叙閒住四川巡撫馬翼聽勘副都御史陳祥致仕副
都御史林琦周金侍養參議許驤等宜起用從之

二十年吏部覆御史周亮奏謂余應舉禁驚督撫之任選
擇宜豫請令兩京科道官從公論薦本部仍疏名上請
詔可於是給事中邢如默等奏薦見任尚書毛伯溫劉

天和叅政於敖張邦原任尚書唐龍張潤侍郎高公韶
閔楷都御史張景華翟鵬萬鏗陳九疇韓邦奇翟瓚按
察使李宗樞副使陳大綱叅議王洙御史程啓充王潢
段汝礪俱可用御史疏薦亦同惟瓚洙汝礪三人不與
焉吏部議覆得旨楷大綱准起用給事中劉繪因言汝
礪係大學士翟鑿姻戚洙瓚係大學士夏言親屬如默
特排羣議而薦之夫內閣挾權以通言官言官懼勢而
拂公議上下扶同恐非社稷之福乞將鑿等罷黜罪譴
以爲徇私植黨者之戒上是繪言詔今後吏部擢用
科道薦舉須知天工人代之義一於公選不許徇私示

惠訪出重罪不宥遂出如默外任爲徽州府推官而罷
瓚等不用以翟鑿忠謹特命留之

二月巡按陝西御史張光祖疏薦致仕南京禮部侍郎呂
柟安貧力學忠信篤敬雖年踰六十精力尚強乞不循
常格卽賜擢用疏下所司

三月初臺諫交章薦用舊臣吏部議請如所奏上命李
廷相唐龍屠僑張景華顧似王道鄭本公王崇慶等叙
用惟呂柟何璿不叙

二十一年九月巡按江西御史沈越疏舉遺廢如原在尚
書周期雍侍郎簡霄都御史萬鍾贊善羅洪先給事中

曾忭詹泮御史曾孔化郭弘化副使江以達王奠叅議
王臣知府何祉或因自陳或因詿誤各罷家居乞勅吏
部察訪錄用章下所司

御史焦璉等奏虜勢重大請錄廢棄人材以備任使上
從其請仍令嚴加詢訪如有欺罔徇私者連坐不貸尋
給事中沈良才御史王紳等交薦原任尚書唐龍侍郎
任洛都御史劉源清張珩韓邦奇陳九疇李珏給事中
魯忭鄭自璧錢薇御史程啓充副使張庠王獻等共十
三人章下所司開奏已吏部尚書許瓚因薦原任巡撫
賈啓歐陽重劉文莊大理寺丞周鳳鳴叅政劉一正樂

國朝典彙卷四十一
護知府夏雷及見任工部主事劉鳳池推官劉壽均當
收錄 上命再會同各衙門斟酌議擬具奏
二十五年給事中楊上林等連疏請錄用遺逸 上命吏
部擇才果堪用者詳具履歷以聞於是吏部疏奏原任
尚書章拯侍郎劉源清等三十人 上以拯等俱先黜
當其罪而無罪者又年老非才報罷

二十九年巡按山西御史陳九德奏薦邊才稱原任侍郎
張漢潘高皆才略可用 上以高考察被黜漢奉旨謫
戍無錄用理因責九德違例市恩下部院叅劾黜爲民
禮部尚書徐階疏薦原任都御史何棟副使聶豹 上命

亟查取用

三十年南京科道等官奉旨會舉邊才吏部覆議原任御
史王璜咎如思編修唐順之主事唐樞叅政胡松俱堪
起用 上曰虛名浮譽罔人可乎俱報罷

三十七年七月 上從給事中徐浦議九卿科道及督撫
諸臣各舉邊材於是原任侍郎郭宗臯都御史吳梯方
涯主事唐樞鄒守益修撰羅洪先叅政周孔翥亨叅議
劉志知府黃華在舉中吏部併覆起用御史羅廷唯奏
曰臣觀徐浦之疏意以邊材爲急耳而諸臣所薦乃有
不盡然者據其所舉文臣不曰胸藏萬甲則曰籌決千

里武臣不日身經百戰則曰雄當萬夫是于劉基百徐
達竝生於一時矣何遺才如此多耶况其間又有以清
修苦節實學醇資舉者卽他日復起必不署之戎馬縱
橫之場而高談於環佩雍容之地其去言官初議失之
遠矣甚或鑽刺方行而此舉適有以投其機罪過已深
而此舉反得以藉其口延遷日久而此舉復有以招其
來是因明詔以開侍門有志之士方且羞與爲伍 陛
下安得而用之卽如近日兩廣總督郝孟陽以斬虜報
功矣而御史龔愷乃劾其濫殺百姓福建巡撫阮鶚以
知兵受薦矣而御史宋儀望乃劾其不諳一籌舉之者

不肯任其非劾之者竟無所庸其力此含糊隱忍之習
成而名實之淆邊方之壞終未如之何也已此臣所以
重爲國家用人惜也 上嘉納其言切責諸臣薦舉泛
濫吏部題覆依違之罪所薦諸臣亦不用

三十八年四月兵部郎中唐順之奉詔協贊浙直兵務總
督侍郎胡宗憲薦其有文武才第權輕不足展布宜超
格用之時順之已擢太僕少卿以宗憲言復陞右通政
命與宗憲共事

四十二年正月御史凌儒疏陳時事舉羅洪先等皆強年
重望乞早爲旣錄 上惡其市恩賣直無故奏擾命錦

衣衛逮至午門前杖六十黜爲民

五月給事中陳瓚疏陳黜遺奸采遺賢二事遺奸謂文選郎中南軒奸貪著聞宜罷黜遺賢謂在告諸臣中原蒙恩許待用者宜錄用部覆軒過誤則有之若坐贓無實跡請量調南用其采遺賢一事當如議上不悅手批之曰軒准調用爾等全不看詳此疏中之意縱其欺擾陳瓚心欲行儉儒言巧幻深奸豈真忠爲國者其令錦衣衛如旨奉行儒謂前御史凌儒也於是錦衣衛執瓚廷杖六十發爲民

四十四年議准通行各撫按於所屬中不論舉貢進士

有賢能一體保舉


隆慶元年令各處撫按將境內人才逐一搜訪會本具奏以後撫按復命及巡撫年終各舉行一次又議准兩京九卿并各科道廣詢博訪有才略過人忠誠任事者或堪各邊督撫或堪各邊兵備有司或堪任清理屯鹽無分覓任去任各力疏薦日後所舉之人果有成績并舉主一體陞賞如僨事殃民將舉主重加罪罰給事中劉伯燹疏薦原任侍郎萬恭都察院耿隨卿張景賢曾于拱皆有絕異之材可備緩急宜及其年力未衰破格起用部覆從之

給事中韓楫疏薦原任大學士郭樸尚書霍冀左都御史
 劉濤侍郎陸樹聲吳嘉會楊魏冀鍊都御史張松李燧
 溫景葵張祉御史劉存義柴祥吏部主事魯邦彥行太
 僕寺蔡結叅政馮臯謨姚九功副使溫如璋張嘉孚陳
 宗虞盧益黃憲卿張昇叅議常三省僉事沈淮知府張
 萬紀請錄用部覆朴係輔臣當俟宸斷九功宗虞萬紀
 以考察去令甲甚嚴不敢擅更他皆如楫議 上是之
 三年題准舉人中如有孝友睦婣名實相孚不分已未坐
 監許撫按官會薦遇有兩京博士等缺酌量推用
 南祭酒姜寶薦舉人趙蒙古詔授學正蒙古大學士貞吉

第也

以陝西舉人呂潛為學正以撫按張祉等交薦其孝廉也
 九月詔舉邊才時諸司各以名上見任則楊魏等八十二
 人丁憂則都御史石茂華等七人養病則侍郎吳桂芳
 等八人部議俱宜以次擬用

四年三月御史周禧上言論才者先人品而後事功取才
 者捐細瑕而觀大致故漢高帝舍匿金之過資其奇謀
 文帝赦魏尚守雲中匈奴不敢南向何者細瑕在所略
 也鷹揚鼎足之業蓄於渭水隆中而殺妻食子者功可
 嘉而心不可測何者人品在當辨也故金車玉輅不以



載馭則腐聚猶積薪象尊龍瓚不以獻酌則汚賤猶瓦器方今人才竊有餘慨然汲黯在朝潘南寢謀中國相司馬遼人相戒何者其骨鯁忠義之氣足以陰折奸萌而耆舊老成之望可以風動四海今直躉之士犯顏批鱗委頓草莽耆舊之碩非有大故亦漸相繼報罷有識者寧不寒心既舉已試之材棄如振落乃汲汲然有搜遠採有如建大厦濟巨川舍杞梓而別求川澤之材察大艘餘而他覓舟楫之利未見其可也幸念汲黯司馬之臣為國家輕重特賜召還下吏部知之

吏科都給事中王治等言故禮部侍郎何塘理學純臣宜

加美謚原任大學士夏言人品事業雖不可知至所論復套事未為失策其視曾銑均屬無辜宜與雪宥大理寺卿朱廷立刑部侍郎詹瀚鍛成夏言曾銑之獄宜追奪原職部臣覆議皆如其言詔賜塘謚文定復言吏部尚書瀚與廷立俱追奪原職

享和癸亥

